

藏書紀事詩

耐庵題籤

I222.7

257

(b)

藏書紀事詩卷六

長洲葉昌熾

吳山陶生鬻書者日共圍棋一局殘塵垢堆牀寓言耳當時
書貴比珠玕

許宗彥周生

阮文達浙儒許積卿傳君名宗彥字積卿又字周生浙江
德清人父祖京廣東布政使君九歲能讀經史善屬文嘉
慶己未成進士授兵部車駕司主事君常訓諸子曰讀書
人第一須使此心光明正大澄清如止水故名所居曰鑑
止水齋君以嘉慶二十三年十二月二十二日卒於杭州
年五十有一子六兆奎廷窠延澤延敬延凱延毅 蔡之
定許君周生家傳君寡嗜好惟喜購異書不惜重價藏弄
滿樓於書無所不讀實事求是旁及道經釋典名物象數

必殫其奧而後已 嚴元照書手錄太常因革禮後 四

庫全書未收予內兄許兵部宗彥曾從杭州故家借抄副

本歲戊辰備書於杭始獲見之 持靜齋書目鑑止水齋

書目一冊許宗彥撰長洲顧沅從羅鏡泉假錄余與其喆

嗣子雙明府有舊聞其書兵燹後散亡殆盡不勝悵然

宗彥夏日雜詩吳山有陶生託業在書籍攜包買無人時

復就我爽 又題陳蓮汀載書訪友圖邇來懶病百不堪

書箒堆牀付塵垢 又題吳更生引年借書圖近來書貴

比珠玕善本矜奇借亦難不傍靈威仙洞住祇應寫作畫

圖看

薰修白氎寫華嚴畫扇秋江月子纖認取連環雙玉印綢繆

紅上舊題籤

嚴元照久能

錢大昕嚴半庵墓志銘歸安嚴君諱樹蓴字茂先一字半庵生一子卽元照歸安縣學生孫男二人培均 暴書雜

記嚴久能茗溪芳椒堂聚書數萬卷多宋元槧本著娛親雅言爾雅匡名 久能悔庵集書手錄儀禮要義宋本後

此書載於聚樂堂書目朱錫鬯所未見者予財弱冠好宋刻書杭州汪氏藏宋刻本廿冊索值五百金子必欲得之求之急議直廿六萬錢議既定顧無從得如干錢乃盡買家所有書得錢畀之而予書癖之名遂播于一時年來資用日絀度此書不能長爲吾有又寫此本校而藏之它日不得見中郎猶庶幾見虎賁也 東湖叢記歸安嚴修能

購得宋張洽春秋集傳吾邑錢廣伯爲之作緣與朱朗齋
明經往來書札皆議價值之多寡朱朗齋覆廣伯云敝居
停汪九先生宋板春秋一書當時置本實係七折錢六十
兩前需二百金不爲過多此書雖缺究屬久佚之遺經較
尋常宋元板書差爲珍重今讀嚴先生來諭諄諄意殊可
感若必執意昂價是屬市道非所以待有道也但照七折
錢六十兩之數斷不可少勢不能九先生虧本以曲從耳
文藻頓首又復廣伯云書籍流傳除兔園冊子外皆無益
于舉業者必謂有益於舉業而後當出價購求而後當寶
愛此語而出自嚴先生之口立言爲失體矣要而言之此
書在汪九先生從二百金之價議至六十金已屬減無可

減在嚴先生從十六千之價加至卅五千亦屬增無可增
今爲折中之論勸嚴先生再出三千五百文足成五十五
兩之數是否有當伏乞裁定 又云余所見明焦弱侯家
精抄洞天清祿集有修能跋云塘棲宋茗香助教所得舊
簽隸書五字類文待詔古香可愛以香修小印鈐之昌熾
案香修先生姬張秋月字也陳文述碧城仙館詩有香修
詞爲嚴蕙榜作香修姓張氏初名秋月幼媵於無錫嵇相
國家蕙榜娶於嵇乃謀諸中閨而胖合焉且援十六觀經
戒香薰修之語字之曰香修華司馬秋槎屠孝廉琴塢爲
寫秋江載月團扇貽之蕙榜因以畫扇名齋詩凡八首其
第三首云三五冰輪是小名秋同消瘦月同明一聲水調

歌桃葉自向江頭打漿迎第五首云手寫華嚴懺性靈玉
臺香近畫紗櫺連環小印綢繆字紅上蓮花白麤經第八
首云百萬工錢紫玉釵定情詩卷續風懷昨從碧浪湖邊
過本事新添畫扇齋 平津館鑒藏書籍記宋版類編朱
氏集驗醫方有張氏秋月字香修一字幼憐朱文方印石
溪嚴氏芳椒堂藏書白文印

談古相逢燕市中名場溝水各西東長安珠桂還如昔典盡
殘書莫送窮

黃錫蕃椒升

韓配基

士禮居題跋記海鹽黃椒升余二十年前友也頗藏書兼
精篆刻嘗往來吳門從潛學老人游每至必攜古書相質
余時或得之後爲小官於閩中 又輿地廣記宋本第十

八卷改曰建雄軍以上全缺竹垞藏本歸乍浦韓配基壬戌春余計偕北行配基亦以辛酉選拔朝考入都把晤京邸許以十八卷前寫寄後余被黜南還配基亦未得高等彼此音問不通至今不能補全可慨也 又云韓應京兆

試中丁卯科舉人在京邸求售余託五柳主人爲余出百二十金購之 又云賈人從乍浦韓氏得書數百種盛稱中多舊本有施諤臨安志歸簡莊同人賦詩紀事簡莊詩云輸錢吳市得書誇道是西施入館娃宋室江山存梗概鄉邦風物見繁華關心志乘亡全帙屈指收藏又一家況有會稽嘉泰本賞奇差足慰生涯 持靜齋書目文房四

譜五卷黃椒升藏本有醉經樓印

瘦骨凌霜破拘闔小松何似老松強吳涇延令同根否綠柳

橋西戴大章

戴光曾松門

戴大章堯聲

士禮居藏書題跋記笛漁小稿嘉禾戴五松門余舊交也
今春閏月二日有事至禾中夜訪松門于吳涇橋徧閱所
藏之書作詩贈之有句云從好招朋共傷心失子才蓋松
門與余同好而境遇亦相等也 錢泰吉可讀書齋詩戴
小松茂才培成爲松門明經光曾哲嗣馬古芸蔣花隱嘗
寫懷松圖以貽之道光壬寅冬日小松奉圖見示感賦偉
哉松門翁我少常接對瘦骨凌雪霜高論破拘闔不怨匠
石遺絕洗庸俗態送老撫庭柯慘澹冀千載何人抱遺編
有子懷惇誨遂倩碧蘿生潑墨寫蒼黛蔣君亦成圖著紙

露碾礪小松能仰承肅若瞻泰岱老松廕庇之風雨聞警
咳 楹書隅錄宋本說文解字有延令戴大章字□□一
字南軒大章堯聲綠柳橋西戴大章各印

自采梅花煑香粥旋煨梢拙養芋魁洞天清祿君銷受況有
雲煙供養來 宋大樽左彝

兩浙輶軒錄補遺宋大樽字左彝一字茗香仁和人乾隆
丁酉舉人官國子助教著有學古集 王宗炎爾雅新義
序宋山陰陸氏爾雅新義爲世所罕觀吾邑陸君芝榮陳
君培得仁和宋助教大樽手校本審定鏤版 嚴元照書
手錄雲煙過眼錄後自武林歸經塘棲里訪宋茗香觀所
藏書中有丁龍泓先生手抄雲煙過眼錄一冊 東湖叢

記焦弱侯家精鈔洞天清祿集宋茗香助教所得舊簽隸
書五字類文待詔古香可愛 馬廷柵贈宋茗香助教詩
辛苦風塵兩載餘攤書盡日對窗虛棠梨晷影分明在遙
憶先生國子廬 陸素生贈宋茗香詩我言君豈是梅精
雙眉瘦過梅根節清辭妙緒出無窮何似霏霏落香雪又
言君返超山麓自采梅花煑香粥我家芋魁養徑尺煨火
旋煨腴勝肉小隔百里便往來如共山牕聽風竹

廉吏可爲未可爲槃纓請室等湘纍鼓琴誰折芳馨寄三復

于湖次仲詩

張祥雲鞠園

士禮居藏書題跋記輿地廣記余借抱冲殘宋本二十一
卷校勘於聚珍板上今已歸廬江張太守矣太守名祥雲

號鞠園以養親乞歸閩晉江人也丁卯過吳曾見之今聞
以事下獄瘐死矣壬申記 凌廷堪題張鞠園太守揚子
飽帆圖飽帆曾記過中冷今日于湖見使星大抵偉人多
好士由來循吏必通經相逢雖晚頭猶黑禮數都忘眼倍
青笑我攜琴歸自鼓還從流水寄芳馨自注時權蕪湖道
昌熾案太守藏書甚富今多歸同里蔣氏心矩齋

沖虛先傳處度注因可亦草潛夫箋精亡脈極遽長往興言
宿草空泣然

王宗炎穀膝
繼培因可

王紹蘭南陔

陳春東爲

注

沈豫補今言蕭邑藏書之富穀膝王經師家築十萬卷樓
陸氏寓賞樓陳氏湖海樓此外如王中丞南陔汪吏部蘇
潭俱大族皆充棟盈車不假南面百城至讎校精工分晰

眞僞王汪諸君皆精於鄭孔小學非炫飾斯文徒誇排比者可擬也 陳春湖海樓叢書序春資識構昧粗習章句鄙居僻左鈔所聞見蓄疑未達則求教邑中有道之士得以讀其所藏之書於汪吏部蘇潭尤契洽也吏部家富圖籍而搜訪不倦每得善本舉以相示家君高年耽寂自號沖虛七十生朝吏部持手校列子張注爲壽春梓印以呈家君羈然色喜進一觴焉春由是益思流布祕籍以爲親娛謀之吏部先擇攷證經史有裨實用者次第寫版吏部方箋釋鹽鐵潛夫二論鈎稽乙注眇極繭絲復爲春校定所刊書一字之誤緡檢累夕精亡脈極遽爾殂謝春連遶閔凶迷罔廢業追維承顏介壽之樂良朋賞析之難歲月

幾何已殊今昔興言及此況也永歎 王紹蘭潛夫論箋
序潛夫論久無善本求是去非蓋其難也吾友汪主事因
可績學超奇通心而敏會萃羣刻網羅佚聞草創於嘉慶
己巳庚午間時紹蘭讀禮家居辛未服闕握手河梁鄭重
而別忽忽者七八年紹蘭奉職無狀罷官歸而因可墓有
宿草鍵戶省愆故人長往庭蒿門雀不復聞空谷足音矣
一日陳子東爲告以因可書已代謀劓劓受而讀之竊悲
因可豐於學奮於年又喜其能以書自延其年東爲能行
其書以延其年斯可貴也

五色雲中有紫霓三間新築草堂棲建初地荊何時出咫尺

高樓在會稽

陸芝榮香圃

杜煦尺齋

煦弟春生禾子

鐵橋漫稿書爾雅新義後乾隆十五年吾鄉丁小山得影
宋本子京師孫詒穀攜歸武林嘉慶十三年陸香圃刻於
蕭山 沈豫補今言蕭邑藏書陸氏寓賞樓抄影善本之
富爲第一蓋不惜工貲四方書賈雲集輻輳故插架初印
元明板本俱多 暴書雜記乾道臨安志淳祐臨安志海
昌蔣生光煦得陸香圃三問草堂鈔本取以校勘陸香圃
未知其人跋云錄自王庶常小穀家則浙東西尙有善本
可互校也昌熾案香圃所刻爾雅新義前有孫志祖詒穀
跋又自跋云家農師爾雅新義世鮮傳本往得之吳山書
肆謄寫譌脫幾不可讀今春假仁和宋助教大樽校本是
正文字鏤板以廣其傳聞鮑廷博嘗見影宋寫本後有太

原閻徵君跋語他日庶幾見之得以覆加校定抑有厚幸
焉嘉慶戊辰八月旣望蕭山陸芝榮識又坵農師詩二首
其次首末二句云他時若綴三經後五色雲中有紫霓

百宋樓藏書志陸宣公集有三間草堂香圃所藏忠宣第
三十七世孫諸印 丁氏持靜齋書目范忠宣集有朗清
汲古所及三間草堂二印 昌熾又案香圃佚事余詢諸
同年王子獻太史陶星篔簹孝廉皆越中間人不能詳也子
獻言其鄉藏書家有杜煦尺齋杜春生禾子昆弟漢建初
六年大吉買山記其所搜得卽名其藏書之所曰大吉樓
著有越中金石記搜羅甚富有刊本

鄭默中經所著錄不謂私家竟庶幾賸以藕心空首幣楯輪

活碧長苔衣 倪模迂村

北江詩話倪進士模居望江之大雷岸余游匡山回阻風
華陽鎮因徒步二十里訪之其讀書草堂距家三里正面
建德諸山屋旁卽雷港也余以二水山房顏之草堂後小
閣七閒積書至五萬卷金石千餘卷平生嗜古錢撰泉譜
四卷極爲精審 趙紹祖古墨齋筆記嘉慶甲子望江倪
進士迂村名模以所拓古泉二冊索跋則上自高陽太昊
以至前明旁及外國厭勝無不畢具迂村家藏書千餘萬
卷自言在 四庫簡明目錄者十得其八在存目者亦得
其半實吾安徽藏書之冠也昌熾案進士題名碑倪模嘉
慶己未科進士 江上雲林閣書目自序嘉慶二年余曾

有經鋤堂各架藏書序五年構江上雲林閣度書十二廚
中憶弱冠時江鄉僻壤聞見無多年三十一入都每見宋
元善本不惜重價購之教習官學時與孫洪諸人交得秘
本必假讎校琉璃廠載籍甫到輒購之贏六萬餘卷泊任
鳳陽教授十二年稍有所獲屬子孫輩繕一清目以不負
數十年購求鑽研之意云時道光乙酉秋九月上浣江上
雲林閣主人迂存倪模序

莊叟寓言駢拇指柴窰一片古甃缸莫輕重本兼殘本巧合

延津劍一雙

張紹仁學安

鐵琴銅劍樓書目東坡全集有吳郡張紹仁學安藏書朱
記 百宋樓藏書志齊民要術十卷有跋署道光新元三

月十九日書於仁壽里之讀異齋詎庵張紹仁 又道德
眞經指歸七卷張紹仁校本跋曰此本朱墨紛然不易猝
讀今夏酷暑不出戶庭奮勉鈔成益信凡事皆當僴俛甲
申閏七月巽翁識 士禮居題跋記賀方回集半部陳仲
魚所贈頃張君詎庵邀余觀新收之書內有慶湖遺老詩
集之半余細閱之與仲魚所贈竟爲延津之合兼畜重出
本及不全本此余一己之獨見詎庵效尤卽獲奇驗鼓興
弗衰藏書家不又得一人邪 又西溪叢語張詎庵本詎
庵校書心到眼到手到在朋友中無出其右 昌熾案紹
仁長洲人曾居喬司空巷其藏書處曰綠筠廬曰執經堂
詳見士禮居題跋記

三世同耕不稅田後賢功可及先賢誰爲有福誰無福此語

可爲知者傳

張海鵬若雲
恩多服仙

姪金吾月霄

大鑑友柏

邵

黃廷鑑朝議大夫張君行狀曾祖士恆祖朝績父仁濟君
諱海鵬字若雲號子瑜年二十一補博士弟子員絕意名
場篤志墳素先是君考訥齋公與伯兄靜谷公皆好藏書
家多宋元舊刻君治經之暇以剞劂古書爲己任刊學津
討原墨海金壺借月山房彙抄又輯金帚編工始而君捐
館矣居恆嘗語人曰藏書不如讀書讀書不如刻書讀書
祇以爲己刻書可以澤人上以壽作者之精神下以惠後
來之沾溉其道不更廣耶 又張月霄傳月霄名金吾字
慎旃月霄其別字也祖仁濟父光基皆邑諸生月霄年廿

二補博士弟子員卽棄去篤志儲藏與同里陳子準善

又愛日精廬藏書志序月霄十年來小大彙收今古並蓄
合之先人舊藏已有八萬餘卷又念金源氏有中國百十
餘年著作之家乘時蔚起未有哀集其文者遂矢志網羅
以補一朝之闕故于金元兩代遺集更加意搜訪中如王
朋壽之類林孔元措之祖庭廣記蔡松年之明秀集注與
吳宏道之中州啟劄皆當世絕無僅有之書也 李兆洛
詒經堂續經解序通志堂經解之刻百餘年矣金吾張君
以遺編墮簡尙不盡於此乃發其家所藏寫定爲詒經堂
續經解都千二百有餘卷將以次授之剞劂 阮文達虞
山張氏詒經堂記張氏金吾世傳家學代有藏書不但多

藏至八萬餘卷且撰書至二百餘卷刻書至千數百卷古人實賴此與後人接見也後人亦賴此及見古人也是詒經堂詩史閣求舊書莊諸地皆羅列古今人使後人共見之地也此於古人謂之有功於己謂之有福世之有金者無所不爲獨不肯用之於書是謂無福若在己無學術則雖有之肯之亦無能用之若是者亦謂之無福 張大鑑

閒居錄跋先王父靜谷公藏書數萬卷手自校讎寒暑無倦而先大夫京華二十載優游蘭省亦惟以載籍自娛彭芸楣先生贈詩云瑯環宛委窮皇媧蓋誌實也余承先澤耕不稅之田一編一帙罔敢失墜右閒居錄映雪老人手抄照曠從父梓人叢書先人手澤庶幾與是刻常新也癸

亥六月友柏張大鑑識昌熾案靜谷爲仁濟之兄是大鑑
於海鵬爲從子於金吾則昆季行也据此跋是張氏藏書
遠有端緒不自若雲始矣 張海鵬唐撫言跋撫言十五
卷所見抄本後有嘉定辛未鄭昉題識者最爲近古所稱
曰頭本是也按第十卷蔣凝條云曰頭花鈿滿面不及徐
妃半妝後人罔知改作白頭于義甚乖雅雨堂本亦仍其
失予從邵服仙處假得舊本是正益歎校訂之難也 昌
熾案曹根生同年云今雅雨堂本正作曰頭當據此本訂
正 又南部新書跋宋槧久無善本是編乃邵君服仙從
士禮居傳抄者也黃氏藏書富甲吳郡邵君博學嗜古所
抄多絕無僅有之書 平津館鑒藏書籍記南華真經有

小安樂窩邵恩多印二朱記 昌熾案朗仙昭文人余在
菰里瞿氏曾傳錄其山海經校本與張月霄陳子準同時
張陳固爲兩大腹仙抱殘守缺亦不愧小藏家也

金源掌錄混同江烏戍精藍駐客艚豹脚噬人蟬亂走夜深
燒燭坐虛廳 黃廷鑑琴六

虞山人文小傳黃廷鑑字琴六諸生 常昭新志廷鑑少

游趙同詡王庭筠之門精攷證研摩羣籍手校者百數十

種尤練於邑中掌故撰琴川三志補記續記以補鮑盧張

三志之缺 季錫疇第六絃溪文鈔序黃先生琴六館照

曠閣愛日精廬兩家多藏書校讎錯脫實事求是 第六

絃溪文鈔齊民要術跋余三十年來所校古籍不下五六

十種惟文房四譜廣川畫跋皆從訛謬中力開真面今得此書而三矣衰年多病炳燭餘光矻矻于陳編爛簡中作一老蠹魚自笑又自慰也道光乙酉拙經逸叟又讀知不足齋賜書圖記烏鎮知不足齋圖書集成賜書在焉月霄張子輯金源文以未讀鮑氏賜書爲恨遂于己卯閏月買舟招余同往居停於鎮之南宮道院日自齋中載五六百冊分編披讀時當初暑揮汗如雨日暮蚊蟲四集燒燭繼晷日爲之昏不恤也

鬻及借人雖不孝千金敝帚抑何慳可師惟有長塘叟自處

平生通介問

陳揆子準

孫原湘天真閣集陳揆字子準諸生購古籍手自校勘凡

邑人著述及他文集之有關常邑者自唐及今搜羅殆徧
度諸破山寺之捄虎閣輯琴川志注續志世無傳別撰十
卷又輯虞邑遺文錄十卷補集五卷嘗以酈氏水經注詳
北略南著六朝水道疏鈎稽精密唐劉虞稽瑞一卷向來
藏書家未經著錄揆得之因以名其樓 黃廷鑑藏書二
友記吾邑陳子準張月霄二人家世儒學舊有藏書至兩
君而更擴大之儲藏之名遂並甲於吳中四方之名士書
林之賈容挾祕冊訪異書望兩家之門而投止者絡繹於
虞山之麓尙湖之濱嘻盛矣張居西關陳居稍南相去不
半里皆面城臨水暇輒過從各出所獲賞奇辨疑有無通
假相善也兩君志趣同而各有所主張則鍾于經籍而兼

愛宋元人集陳則專於史志而旁嗜說部其大較以網羅
散佚存亡繼絕爲宗旨其于書也張則樂與人共有叩必
應陳則一室靜研慎于乞假余嘗謂月霄古書固不容吝
第得之太易則人不知珍惜昔人以鬻書與借人並稱不
孝良有以也君宐師子準之慎而陳君亦宐少濟以君之
通迺爲得之兩家所藏不下十餘萬卷去其世有傳本與
祕而無闕學問者彙宋元舊刻及新舊抄遊其精妙尙可
得一二萬卷其中多吾邑錢毛兩家舊物淪落他方百餘
年而復歸故土其事殆非偶然矣 潘文勤師稽瑞樓書
目序子準無子歿後書亦盡散吾師翁文端公與子準厚
既卹其身後以重值收其藏本僅得三四散失者已不少

矣今稽瑞樓書目蔭從翁叔平假得刊之庶可與愛日精
廬藏書志並傳也

同有驚人祕笈藏漢唐漢晉各分疆扶風故事如相質一住

鹽官一海昌

馬瀛二槎

馬玉堂笏齋

東湖叢記吾鄉陳仲魚徵君向山閣藏書大半歸馬二槎
上舍上舍余中表行也其吟香仙館書目多世所未見之
本有宋本漢書晉書因以漢晉名其齋晉書爲天籟閣故
物有王弼州手抄補闕之卷真書林瓊寶也 持靜齋書
目桂苑筆耕錄有二槎祕笈馬氏吟春仙館收藏印又曾
肇曲阜集有馬氏收藏二槎藝文宋臨安三志人家諸印
昌熾案吟春吟香不同東湖是其中表當可據三志者宋

周宗乾道臨安志三卷施諤淳祐臨安志六卷潛說友咸
淳臨安志九十五卷皆相傳孤本也 莫氏宋元本經眼
錄宋刊兩漢會要歸武原馬玉堂笏齋明經有道光壬辰
識語又周易本義卷首有玉堂笏齋漢唐齋紅藥山房收
藏私印諸朱記 頤宋樓藏書志洞霄詩集笏齋藏書有
扶風書隱生白文方印又國朝名臣事畧有漢唐齋白文
長印古鹽馬氏朱文方印 暴書雜記錢夢廬云重校證
活人書余昔藏宋板今在豐山馬笏齋明經處或云在馬
二槎處昌熾案據此可見馬氏藏書同時同姓同居浙中
齋名又相髣髴當時同好已不免傳述之譌況後來乎故
此詩詳辨之

鳳子春駒郭未箋神仙蛻骨自何年遽然肯戀花天夢死作

螢乾劇可憐

童銓佛庵

杭郡詩輯童銓字佛庵仁和諸生注云佛庵家北郭貧無
餘貲雅性愛古市集門攤時時搜訪所得頗有佳本惜身
後斥賣殆盡聞其所藏前輩小像多至數十人不知今歸
何處年七十餘賦詩而逝有亡魂願化莊周蝶只戀書香
不戀花句惜佚其全什矣 郭頻伽浮眉樓詞齊天樂童
佛庵有素冊爲蠹魚所蝕其鑿空處皆肖蜨形殆天巧也
詞以寫之近來不食人閒字滿腔都是春恨青簡生涯白
蟬身世幻作漆園夢影羽陵困損算不似花間栖香差穩
莫羨神仙蛻餘且就此中隱有人曝來永晝比夾雪新籤

白描副本栩栩蘧蘧魚魚雅雅兩翅尙黏殘粉滕王休哂
是癡絕書生香奩吟吻展向春風半窗芸葉冷 又沁園
春二娛爲余題蠹蜨卷子比物象形裁雲縫月後有作者
未能或之先矣酒酣以往逸氣空湧閒爲變調以攄鬱塞
之懷并示二娛鑽紙蠅癡伏案螢乾男兒可憐笑吾其魚
矣人言善幻蘧然蜨也或羨成仙五蠹書成一生花活游
戲其間然不然君休問看此中有鬼蟲亦能天 爲君試
質前賢更有箇吾家博物傳是蒙莊闊達未離文字謝郎
輕薄多爲詩篇磊落景純蟲魚詮釋鳳子春駒有闕焉亡
應補任叢殘科斗零落蝸蜒 梁同書蠹蝶詩蠹蝕成蜨
形大小二鬚翅皆具好事者裝冊索題戲作二絕問爾適

從何處來多生結習故書堆自從食盡神仙字一夢南華
便脫胎展卷分明見相蘊世間金粉畫猶輸蟬魚恥作螢
乾死幻出滕王飛白圖昌熾案張廷濟桂馨堂集有爲
童佛庵梁題所集梅花詩又有童佛庵梁以平安錢問梨
刀消息并繫詩次韻奉答詩同時同姓字又同好古坵誌
於此

更無人上沈樓看詩夢初回水國寒輸與鴻堂磨欲盡猶留
蟬翼暈齊紈

沈慈十峯

弟恕綺雲

持靜齋書目歐陽文忠集有沈慈十峯曾在雲間嘯園沈
氏諸印王芑孫題沈君慈十峯圖山高則稱峯竦削雲
爲質九峯第平遠君才自拔出如拳蹲鶴勢無輩與之匹

又題沈綺雲怨柳波消夏圖深柳一灣書半檻乍回詩
夢小專山又料檢新收併舊刊筆山樓作沈樓看逕思徧
借藏書讀壬癸籤分甲乙觀 又三宿齋雜題門人沈恕
自北郭移居城內爲留三日臨去題其新屋曰三宿齋太
息鴻堂帖今同烏篆書墨稜磨欲盡紅目廣非初蟬翼翻
新搨蠅頭證舊儲姑教存故物數典述鄉閭注云戲鴻堂
舊石漫漶今歸綺雲

藏書四千七百種著錄三十九萬言江左俊游賓從美脩脩

天半若霞軒

李筠嘉修林

松江府志李筠嘉字修林上海人候選光祿寺典簿藏書
甚富精於校勘 龔自珍上海李氏藏書志序上海李氏

藏書至四千七百種論議臚注至三十九萬言承平之風
烈與鄴范氏歛汪氏杭州吳氏鮑氏相輝映於八九十年
之間李君猶且恨生晚不獲遇

純皇帝朝親獻書

顧異日數 本朝目錄必不遺李氏吾生平話江左俊游
賓從之美則極不忘李氏東南顧脩脩踞天半矣哉李君
名筠嘉議敘光祿屬官銜不仕道光六年丙戌六月 喬
重禧輓李筍香筠嘉詩卅載吹笙譜白華仙源幫屐麗情
賒園編香雪詩人集樓倚慈雲 孳子家金穴頻年傾郭況
瑯嬛何地讀張華海天從此風 流盡高柳斜陽噪暮鴉注
云君身後藏書盡散 暴書雜記孔氏祖庭廣記滬上李
筍香藏金刻今爲馬笏齋所得

瘴風鹹雨鼓靈潮二百年中字半銷識得書城如武庫守經
終讓古輪廖曾釗勉士 吳蘭修石華

嶺南文鈔小傳曾釗字勉士南海人道光乙酉拔貢生著
有面城樓文存 吳蘭修字石華嘉慶州人嘉慶戊辰舉
人信宜縣訓導著有南漢紀宋史地理志補正 勉士面
城樓記釗嗜蓄書自戊辰迄今七八年得數萬卷襍置聽
事中大人詔釗曰汝畜書亦知畜眾而城守乎數仞之墉
百雉之堞槍雷椎棊之屬徧其下寇環而攻之物未盡而
城已破是物非人力弗用也大黃之弓未嘗不雨射也巡
幾之卒自若聚櫜之聲未嘗廢聞也然軍法驅之久斯困
困斯怨怨斯解是力非心弗永也且夫環十里而城角孛

愚數千百分守則力不給合之應援將弗及勢必危勢危而猶急其力不叛則亡夫讀書亦若是焉已矣畜而弗力學猶弗畜也力學而弗心得猶弗力也汝其勉治汝心釗曰唯謹識不敢忘 又古翰廖山館藏書目錄序歐陽子曰好之而無力雖近且易有不能致余每誦而悲之然亦用是自豪蓋余室四壁立獨插架數萬卷且有宋元槧及舊抄手校本紙墨奇古丹鉛淋漓清風逗簾展卷流連未嘗不私心竊喜謂幸不中廬陵之言也石華書其後云嶺南地溼易長蠹魚藏書無至二百年者吾家守經堂藏本多於勉士而舊槧不及焉勉士嘗云當無聊時閱古人書目亦自快意可想見其癖好矣 陳昌齊守經堂記守經

堂者吳君石華藏書之堂也君富於書四部叢焉獨稱經
何宗聖也

是亦灌園陳仲子草堂何在在西昫羌無故實旁皇索但識

名增字仲遵

陳增仲遵

潘曾瑩墨緣小錄陳葦汀增長洲人工水墨用筆幽秀似
趙千里 士禮居珩璜新論跋西昫草堂者陳子仲遵之
居也仲遵頗嗜古書 又麟臺故事跋景宋舊鈔三卷歸
於西昫草堂 暴書雜記家夢廬翁於愛日精廬藏書志
記所見禪月集曾見吳門陳氏葦汀藏列朝詩文集目有
白蓮集三十卷抄其副本文集五卷已失傳所存惟詩二
十五卷耳 鐵琴銅劍樓書目徂徠文集卷首有平江陳

氏西昫藏書及陳樽印二朱記昌熾案說文樽舞也引詩
樽樽舞我今詩作蹲其字从土正字通又有从土之樽與
樽同陳君之名當从土

豁厚爲門平作架翠屏鬼斧費雕剝石函一一如靈寶但少
龍威到隔凡

葛香士

嚴可均書葛香士林屋藏書圖後葛香士居林屋之山鑿
壁爲架以藏古書我鄉張氏鑑爲作圖且爲文以記之余
未識香士而張氏則余舊交也林屋有靈寶石函神禹所
發故其民風往往能聚書前明如葛氏一龍蔡氏羽其尤
著也香士爲一龍族孫能承先志益張大之可謂賢矣編
有書目余未之見見其圖爲神往者久之余嘗持論幸生

右文之世挾數囊金購書蘇杭市不半年可致累萬卷
此有力者常事亦何足以自豪當視 四庫所未著錄阮
氏所未續進幸而得之區區此願霸然大公耳今檢架上
得天聖李季所編乾象通鑑等八種皆寫本世上絕無僅
有者香士好事倘亦得古書與余所藏有鐫兩相稱者請
走使來告互相借鈔則菑林勝事也不然家有敝帚享之
千金將恐龍威笑人 張鑑包山葛氏澂波皓月樓藏書
記去春病起始來西山葛君香士坐余於澂波皓月樓其
樓據銷夏一灣之勝前盪洪波卻負崇巘纓嵐帶阜雲謫
波詭因鑿樓之兩壁以居書書不下數萬卷每當楸桐負
日桂筍尋波游觀旣倦難燭繼晷其書經史駢羅部帙峻

整集舊者辨其薰蕕版新者慎其魚虎自甲而丙而丁依
四部例悉著於目舉凡鳳館之新章兔園之祕冊不與焉
道光二年六月朔日

社酒唐華憶討春舊游如夢復如塵蛛絲馬蹟緣沿得好鳥
飄風變幻頻

劉桐舜輝

兩浙輜軒錄補遺劉桐字舜輝一字疏雨烏程貢生著有

楚游草楚游續草聽雨軒橐 張鑑暝琴山館藏書目序

疏雨雄於貲而多家累年未三十卽棄舉業遠游楚余課
誦其家積十餘載之久疏雨歸則與談杭州谷林堂趙氏
暨揚州玲瓏山館馬氏之耽書好客未嘗不神往焉乾隆
壬子癸丑間疏雨旣以藏書自任吾湖固多賈客織里一

鄉居者皆以備書爲業出則扁舟孤棹舉凡平江遠近數
百里之間簡籍不脛而走蓋自元時至今幾四百載上至
都門下迨海舶苟得一善本蜘蛛絲馬蹟緣沿而購取之故
吳門萃古齋旣名聞當世而下此如竹垞經義攷所云坊
朋賈友亦不可枚數疏雨旣好書而余又適館其家堂構
閒曠每夏秋之交設長筵廣座名花異卉駢列左右主人
命門者延若屬呼僦嘯侶至卽十餘輩余課經之暇亦相
與商榷是非書旣山積眞贗參半鑒別不易其時同人之
與疏雨洽縞紵者如楊秋室范白舫計秋琴蔣嗜山間亦
過從或有所得傳觀以爲賞析自此疏雨之書固已不啻
數萬卷矣如是者有年適值盧氏抱經堂吳氏瓶花齋讐

校精本散出四方於是疏雨所收之富又越從前數倍癸亥之秋一病遽歸道山其家不能收拾子幼爲人熒惑舉十餘萬卷之書一旦畀之他人秋室題其身前訪書圖云自古圖書厄多經劫火亡未聞豪賈奪舉作債家償洵實事也飄風好鳥變幻若此斯可歎矣今年余病肺倦游過白舫齋頭則所藏舊目與估估帳籍宛如昨日痛盛游之難再悼勝賞之莫償失今不治并有與此目同歸漸滅者因破十日之功與白舫秋琴嗜山訪其大略編爲一目知其中實有足以備金匱石室之講求啟陳農苗發之夢想者豈第涇王大唐郊祀一錄同於煙銷灰燼屈指其間不過二十餘載世故之難問已如此之速可勝道哉此書之

失不特吾人同社眼福之薄卽謂吳興山水精英不能蘊
此奇觀以供後來之抉摘奚不可也疏雨姓劉氏名桐援
例授州司馬暝琴山館其所居東廂藏書之地 王翰青
鄂舟過劉疏雨書齋詩幾年羈旅隔天涯心每相親跡甚
賒衝凍徑來謀社酒討春先喜見唐華水精簾卷明於月
雲母窗虛白勝紗裊拙定慙珠履客墨莊偏許問籤身

巖可均題劉小夢憶書圖冊君家疏雨吾好友積書之癖
與吾同別來江子亭邊樹終古山陽笛裏風人有微名都
折福世間豪舉總成空祇今說着眠琴館卅六年前一夢
中 楊鳳苞題訪書圖劉三桐少好聚書楚游歸後搜羅
益富積至數萬卷築眠琴山館貯之猶以爲未備嘗屬杭

人奚岡繪訪書圖以見志惜不中壽淹忽卽世嗣子煥幼
弱其書皆爲市人竄取以去可歎也君從子渙寶弄是卷
出示索題傷逝者之不作慨遺書之悉亡頽唐老筆言之
不文聊以紀實而已嘉慶十五年涂月尙賸吳生畫香廚
久棄捐傷心餘簿錄過眼付雲煙厭架猶如昨充箱孰與
遷藉君珍此卷想像舊瑤編自古圖書厄多經劫火亾未
聞豪賈效舉作債家償編校留希弁飄零憶蓼塘披尋一
棖觸老泪忽淋浪

山薑倚牆放疏蕊蒼藤喬木水爲鄰舊廬正在瓶山麓掇拾

寒灰歎積薪

程廷獻書城

張鑑楓溪程君耐葬墓記楓溪擁巖程君卒十載季子文

榮來謁文按略君諱廷獻字書城擁巖其號也弱不好弄
輯古佚書帝王世紀三輔決錄凡十餘種舊居瓶麓藏書
甚富得舊鈔北堂書鈔與明世所行海虞陳氏校補者大
異復感發輯蒼頡字林尤備視孫任兩家不啻有積薪之
歎焉 又楓涇程氏藏書甚富長夏蘭川主人遣僕以瓶
麓讀書圖索題二首鈿軸身籤萬卷餘井眉大好讀書廬
異時苗發從相訪長水長塘或不如此生結習每流連觸
熱披圖亦墨緣安得借鈔親撥棹一株平仲指山前注云
瓶山因積酒器而成見縣志 又南陽村圖歌楓涇鎮市
尾曰南陽村有舊廣宅三面環水蒼藤老樹百年物也蘭
川得之將移居遣人徵書畫因成此寄之君家老屋涇水

濱近復卜築來南村水三面環隔咫尺舊時喬木今猶新
又云山薑倚牆放疏蕊珠簾壓架交長根家具雖少有雞
犬洪崖婦子顏溫存汗牛經史萬卷富充箱金石千番屯
日長無事坐花下歐趙洪薛殊斷斷昌熾案蘭川疑爲文
榮之別號

牝雞持鬻百錢時高閣秋燈憶母慈好鳥飄風三歎息第將
甬上祝延之

計光所曦伯

張鑑秀水計氏澤存樓藏書記秀水計氏二田介王徵士
研農以所受尊甫慕雲先生藏書來請爲記二田承餘緒
非一世築澤存樓縮衣節食引而弗替凡得自書賈書船
以及長塘鮑氏借抄者總經史子集爲卷六萬二千有奇

余自束髮至南北舟車所接皆藉書卷爲淹滯而旋聚旋散不勝飄風好鳥之歎就所見瓶花齋之散吾友眠琴山館得其茗溪集德清許部曹得其隸釋隸續皆舊抄本小山堂之散於友人處見蜀石經毛詩殘帙急勸鬻之爲士禮居豪奪去天籟閣之散則字畫多於卷籍神仙起居注其一也曝書亭之散於吳門書肆買得北盟會編前有竹垞著錄之一之印方是時渠家贖新塍張簡庵遺書未散而所著瀛洲道古錄稿本尙在也又嘗因海上之役兩登天一閣太息三百餘年靈光巋然夫士微時不能具竹素楊士奇之母至爲鬻牝雞以易史略釋文十書直音其得之難如是若旣聚之可不思所以永其傳今二田少孤撫

於其母閉門力學有劉氏墨莊之風余故述散聚之由卒
歸之甬上以爲頌禱之辭云道光甲午中秋 又澤存樓
藏書後記秀水計曦伯母沈太孺人能以詩書勗子孫如
新諭劉式妻陳之治墨莊余過高明之家網羅放失汗牛
充棟迨其後風鎗石火撇焉灰燼其故何也必先有不能
爲之主持定識定力如計氏於是益欽太孺人直超出尋
常萬萬斯克成此偉觀也 又二田齋記聞溪計氏曦伯
多積書籍以培其基間好畫以陶鑄其性靈舊藏多沈石
田憚南田真蹟因以二田自號并名其所居之齋 又題
計二田光炘冷音閣校書圖高閣疏林外攤書日掩門淵
源文苑舊家世黨人尊葉埽秋鎔永鉛研春露繁百年聊

晤對風雨正忘言

首蓓闌干老廣文江南雙鯉寄殷勤論詩欲訂疑年錄未必

禮堂事鄭君

王雨樓

開有益齋讀書志王黃州小畜外集三十卷爲河間紀文
達公所藏據以錄入 四庫者也余後至菰城晤王雨樓
學博始見宋刊本亦止七卷未知卽文達所藏否 甯宋
樓藏書志寶祐會天厯李銳跋吾友徐秋厓孝廉過訪云
其友人王雨樓文學博雅好古喜收祕笈金望欣跋湖州
兩樓廣文余丙子同年王海濤之弟也收藏古書最富道
光壬寅余客歸安時相過訪 又嵇康集十卷王雨樓表
兄家藏乃叢書堂校宋鈔本從士禮居轉歸雨樓妙道人

書道光十五年十一月初九日 張文虎懷人詩王生世
彥雨樓一首經年住江北回首憶江南鄭重寄雙鯉語少
意自諳欲知我衰意絲鬢不勝簪昌熾案雨樓廣文道光
間人其年不在嘯山先生下何以北面稱弟子或名世彥
者別一雨樓乎記此以俟考

百衲絲桐藏篋衍一牀金薤整籤題風流罪過登彈事空有
蓮臺善業泥 劉喜海燕庭

鮑康劉氏長安獲古編序燕庭先生爲文正文清公孫文
恭公子韋平之閨室無長物惟手輯金石文字逾五千通
服官中外廿餘載所至不名一錢而篋中錢幣尊彝載之
兼雨蓋博古君子也 又題唐泥造像搨冊唐善業泥造

像前人未經著錄道光己亥劉燕庭丈游慈恩寺始於雁
塔下拾得或全或闕大小凡八具全者一面一佛坐蓮臺
二尊者侍下或蹲二獸陰以娑羅樹一面則大唐善業渥
壓得真如妙色身三行十二字陽文遒勁若敬客書詫爲
奇觀作長律紀之 又題燕庭金石苑後卽送之入都詩
卅載搜奇書滿家藏來寶刻徧天涯斜陽古市無人迹爲
讀殘碑剔薜花 錢泰吉校史記雜識少時閱讀書敏求
記心羨百衲史記恨不得見戊申初夏諸城劉燕庭方伯
言於廟市購彙集宋本每卷多有季滄葦名字印當効遵
王爲之者一南渡以前本但有集解一本兼有索隱恆字
慎字缺筆當是南宋本一本卷尾有建安蔡夢弼傅卿謹

案京蜀諸本校理寘梓於東塾二十字 又云劉方伯所

藏尙有集解索隱正義合刻本卷末有校對宣德郎祕書
省正字張耒隸書木記與天祿琳琅所記同 開有益齋

讀書志助字辨略五卷濟甯劉淇武仲撰劉燕庭方伯欲
鐫不果余送方伯於嘉禾舟次方伯曰六藝綱目未得盧
抱經校本寶刻類編未補其闕卷助字辨略未刊三憾事
也 昌熾案先生在浙藩時以風雅好古爲某中丞劾罷

潘文勤師言曾見所藏宋刻唐人集數十家皆精本也

四經四史同一齋望洋向若歎無涯稽天始有逢原樂此事

難教語井蛙

楊端勤以增

子紹和彥合

梅曾亮卽墨縣教諭楊府君墓志銘君諱兆煜字熙崖聊

城人嘉慶三年舉於鄉大挑得卽墨縣教諭予以增壬午
進士 又海源閣記昔班固志藝文自六藝而外別爲九
流則凡書之次六藝如諸子者皆流也非其源也況又次
於諸子如詩賦諸略者乎然當秦火後餘裁數經至漢成
帝時間二百年書已至萬數千卷之多而自漢以後幾二
千年以至於今附而相推繳而相摧演而愈清醜而愈支
昔之所謂流者且溯而爲源而流益浩乎其無津涯故書
猶海也流之必至於海也勢也學者而不觀於海焉陋矣
雖然是海也久其中而不歸茫茫浩瀚愈遠而不知其所
窮惘然不知吾之所如浮游乎無所歸休以終其身爲風
波之民不亦憊哉 又曰同年友楊至堂無他好一專於

書然博而不溺也名藏書閣曰海源是涉海而能得所歸者歟或曰信如子言凡書之因而重駢而枝者悉屏絕之其可乎曰烏乎可游濫觴之淵而未極乎稽天浴日月之大浸是未知海之大也又安能知源之出而不可窮也哉

楊紹和楹書隅錄跋先端勤公平生無他嗜一專於書所收數十萬卷皮海源閣藏之屬伯言梅先生爲之記別關書室曰宋存貯天水朝舊藉而以元本校本鈔本附焉癸亥甲子間紹和里居撰海源閣書目成復取宋元各本記其行式印章評跋管窺所及閒埵跋語乙丑入翰林簪筆鮮暇此事遂輟頃檢舊稿之已成者釐爲五卷名曰楹書隅錄同治己巳仲夏聊城楊紹和彥合甫識 楹書隅

錄宋本毛詩先公於己酉購之揚州汪容甫先生家辛酉
皖寇犯肥城西境據予華跗莊陶南山館者一晝夜自分
珍藏圖籍必已盡付劫灰及寇退收拾餘燼尙十存五六
而宋元舊槧所焚獨多此本僅存十八至末三卷豈真大
美忌完理固如是乎然錢遵王有言此等書勿論其全不
全譬諸藏古玩家收得柴窑殘器半片便奉爲天球拱璧
而况鎮庫典籍乎 又云桐鄉陸敬安冷廬雜識云聊城
楊侍郎得宋板詩經尙書春秋儀禮史記兩漢書三國志
顏其室曰四經四史之齋可爲藝林佳話然先公所藏四
經乃毛詩三禮蓋爲其皆鄭氏箋注也尙書春秋雖有宋
槧固別儲之先君與陸君平生未識面當由傳聞偶誤耳

漫疑荒幻等齊諧帳祕由來重伯喈欲向榕城撥遺燼青山
踏破幾芒鞋

陳徵芝蘭鄰

嚴可均北堂書鈔書後孫淵如得書鈔原本後爲何夢華
所得夢華棄世其子以售於秀水令陳振之振之閩人昌
熾案此書今歸同里蔣太守鳳藻顏其藏書之室曰書鈔
閣周季貺星詒云陳名徵芝非振之嚴氏得之傳聞故音
同字誤又讀書敏求記季貺有校語云說文解字三十卷
繫傳四十卷福州陳氏帶經堂藏有宋刻本丙寅歲向星
村秀才索觀則爲其從兄攜赴臺陽學舍矣悵惜久之陳
氏居在文儒坊其先人蘭鄰大令以名進士爲令浙江藏
書甚富星村名樹杓亦善鑒別予書大半得之渠家 陸

心源帶經堂陳氏書目書後帶經堂書目五卷陳蘭鄰大
令所藏書也予粵東歸田本無出山之志後聞陳氏藏書
散出多世間未有本遂奉檄一行及至閩遍訪陳氏後人
僅得張清子周易纂注金仁山尙書注楊仲良長編紀事
本末三書餘皆不可得其孫字星村者亦略知書詢以各
種秘冊則云最秘之本其先人別儲一樓爲蟲蝕盡或者
當在其中其信然耶周季貺太守謂其目爲星村所偽造
然如梁溪集玉堂集等皆注明藏印及序人姓名恐非偽
造後之人其再訪之

湖上羣山山上樓校書人共住樓頭寫官樓下雁行列門外

借書人繫舟錢熙輔鼎鄉熙祚錫之熙泰鱸香熙載
嘯樓熙經心傳

張文虎愚庵錢公家傳公諱樹芝字瑞庭別號愚庵先世
自奉賢遷今之金山祖鏗嗣父溥義公生無他嗜好間以
金石書畫自娛五子熙恩熙輔熙祚熙哲熙泰 松江府
志錢熙輔字鼎卿蕪湖教諭婦翁吳省蘭輯刊菟海珠塵
至八集而止熙輔續輯壬癸二集以竟其業弟熙祚字雪
枝敘選通判好表彰古今祕籍輯刊守山閣叢書及指海
珠叢別錄素問靈樞凡數百種儀徵阮文達序其書謂於
人謂之有功於己謂之有福後以謁選病歿京邸熙泰字
鱸鄉廩貢生署靖江教諭 又錢熙載字嘯樓好藏書
張文虎候選訓導錢君殯志君從弟錫之輯守山閣叢書
招予佐其事君多藏祕帙時假校錄君諱熙經字心傳別

自號漱六祖溥義父樹立子培名培炳培繼 又顧尙之
別傳君名觀光字賓王尙之其號世居金山鄉錢氏多藏
書恆往假恣讀之錢教諭熙輔輯菡海珠塵壬癸二集及
刊重學錢縣丞培名輯小萬卷樓叢書君皆與參訂 又
勤有書堂贖稟序鼎卿先生好沉默淵覽晚歲常居郡垣
谷陽門外別業聚書益多春木姚丈爲取韓退之語額之
曰勤有書堂 又孤麓校書圖記浙江文瀾閣在西湖孤
山下功令願讀中祕書者許領出傳寫道光乙未冬錢錫
之通守輯守山閣叢書苦民間無善本約同人僑寓湖上
之楊柳灣去孤山二里許面湖環山上有樓樓下集羣胥
間日扁舟詣閣領書命抄畢則易之同人居樓中校讐湖

光山色滉漾几席間意豁如也是役也校書八十餘種鈔書四百三十二卷同游六人金山錢熙祚熙泰顧觀光平湖錢熙咸嘉興李長齡南匯張文虎又十三間樓校書圖記西湖寶石山之半蓋有宋十三間樓舊地爲東坡守杭時治事之所今地入彌勒院郡人瞿君世瑛重輯己亥庚子秋錢君熙泰續文瀾閣校書之役偕予兩寓於此樓前爲後湖夾岸卽錦帶橋動止殮寢皆在竹陰嵐翠中

張鑑金山錢氏守山閣藏書記去金山縣十八里曰秦山山石柔脆道光丁酉官以築海塘伐石別駕錢雪枝尊甫持論爲無益廬墓千計徒被毀掘命雪枝倍其輸以告當事得已由是閭里相與慶於路乃構宗祠於麓復爲閣以

貯藏書顏曰守山蓋自其祖羽章先生來居此垂二百載
冀與此山相守於無窮也 熙祚西湖雜詠詩楊柳灣邊
做小樓畫中詩思鏡中秋清風入座丹黃罷四壁湖山作
臥游一角孤山倚日邊文瀾光彩照湖塹草茅何福窺中
祕身到瑯嬛第四天自注閣凡三層連平地爲四

藝芸散後歸何處盡在南瞿與北楊惟有宋元書目在一編

中有小滄桑

汪士鐘閩源

同治蘇州府志黃丕烈藏書歸長洲汪士鐘士鐘摹刻宋
本孝經義疏儀單疏劉氏詩說郡齋讀書志諸書讐對
精審舉世珍若球璧 黃丕烈郡齋讀書志序閩源英年
力學讀其尊甫厚齋先生所藏四部之書以爲猶是尋常

習見之本必廣搜宋元舊刻以及 四庫未采者於是厚

價收書不一二年藏弄日富 顧廣圻藝芸書舍書目序

汪君閩源藏書甚富取宋本元本別編其目各成一冊汪

君宿具神解凡於有板以來官私刊刻支流派別心開目

瞭遇則能名而又嗜好所至專壹在茲仰取俯拾兼收並

蓄揮斥多金曾靡厭倦以故郡中傳流有名秘笈搜求略

徧遠地間風挾冊趨門朝夕相繼如是累稔遂獲目中所

列宋若干種元若干種既精且博希有大觀海內好古敏

求之士未能或之先也 潘文勤師藝芸書舍宋元本書

目跋吾郡嘉慶時黃蕘圃周香嚴袁壽階顧抱冲所謂四

藏書家也後盡歸汪閩源觀察蔭之姑母歸觀察之子珠

林比部德英蔭少時至汪氏山塘所居其堂宇軒敞樹石
蕭森堂中懸楹聯種樹似培佳子弟擁書權拜小諸侯阮
文達隸書阮與汪故有連三十年如在目前也咸豐庚申
已前其書已散失經史佳本往往爲楊致堂丈所得兵燹
以後遂一本不存今從其家得宋元書目鈔本富矣精矣
眞不減東澗滄葦皆蕘圃澗蘋諸老爲之評定故絕無僞
刻昌熾案汪氏書長編鉅冊皆歸菰里瞿氏歸楊氏者其
畸零也聞源父厚齋名文琛開益美布號饒於貲祁文端
刻說文繫傳序所謂假之富民汪氏未得者也其藏書印
曰民部尙書印又有三十五峰園主人印

吾識虞東隱君子晁陳絕學守叢殘高齋雞黍猶前日悵絕

身絃不復彈

瞿紹基蔭棠
潛性之

季錫疇菘耘
子鏞子雍

孫秉淵敬之

秉

同治蘇州府志瞿鏞字子雍歲貢生居菰里村父紹基好
購書收藏多宋元善本鏞承先志益肆力搜討常邑自絳
雲汲古以至愛日稽瑞二百餘年間儲藏家代不乏人鏞
所著鐵琴銅劍樓書目既博且精足爲後勁 黃廷鑑恬
裕齋藏書記出賓湯門十里其塘曰南塘辛峯左峙清水
東潏有村曰胥里沃壤千畦桑竹彌望故學博蔭棠先生
隱居在焉有齋曰恬裕其藏書之所也君以明經選授廣
文一試職卽歸隱讀書樂道廣購四部旁搜金石歷十年
積書十萬餘卷昕夕窮覽嘗繪檢書圖以寓志時城中稽
瑞愛日兩家競事儲藏先後廢散君復遴其宋元善本爲

世珍者拔十之五增置插架由是恬裕藏書遂甲吳中嘗
慨世之好典籍者皆爲造物所忌今君之喆嗣子雍明經
克成先志搜奇羅逸不懈益勤則藏書爲造物忌之說于
是不讐矣道光庚子十月朔 張星鑑懷舊記季明經錫
疇字菘耘太倉州人敦品勵行爲文謹守先正出入震川
堯峰之間晚年館虞山瞿氏館中多善本書得於黃氏士
禮居者爲多君悉跋尾遂成藏書志若干卷 同治常昭
兩縣志流寓傳錫疇校書盈千種異同舛誤靡不悉心攷
證咸豐十年避寇李墅抑鬱以終遺書千卷燼於火 昌
熾案瞿氏藏書今尙巍然無恙庚申之難子雍先生子秉
淵字敬之秉濬字性之載其遺書避地江北間關轉徙竟

脫於難繪虹月歸來圖以誌幸余嘗偕管子申季王子芾
卿三度訪之敬之兄弟盡出藏書以見示并以鐵琴銅劍
樓書目屢爲補輯每到必盤桓日夕談晁陳之學相得甚
懽自丙子以後余南北奔走不復能再敬瑯環而敬之兄
弟亦先後歿謝眷念黃墟爲之三歎

一片湘雲盪水涯茶鐙藥臼費安排東湖西塞聽人說卻似

隨齋爲直齋

錢天樹仲嘉

舒藝室詩存錢夢廬天樹當湖老名士也以嗜古好客貧
其家性喜竹仿竹裏煎茶圖寄予題之清波一片蕩湘雲
綠映鬚眉對此君室有圖書供遣日座餘賓客快論文茶
鐙藥臼憐中歲漁婢樵青數舊聞猜作元真渾不似東湖

西塞聽人分 暴書雜記夢廬篤嗜古籍嘗於愛日精廬
藏書志眉間記其所見猶隨齋批注書錄解題也 士禮
居題跋記邵埽編三卷讀書敏求記云王伯穀藏宋刻後
歸牧翁付之絳雲一炬平湖錢夢廬新得宋書棚本不知
與絳雲原本同乎異乎夢廬本爲歷來藏書家珍貴玉蘭
堂竺塢二印文是也又有七十二峯深處一印取穴研齋
寫本證之多同述古何人舊姓錢向時書籍等雲煙虎賁
猶作中郎想摹本猶傳邵埽編小劫樓頭起絳雲六丁取
去世無聞浙中別有儲藏富三卷居然是祕文懷人異地
各闡名一紙書馳兩日程忽爾夜航來遠道開函古豔使
人驚曾留竺塢玉蘭堂邵在文家不是王七十二峯深處

好幾家流轉感滄桑君家書籍憶臨安多少奇文是宋刊
十卷茅亭客話本攜來雙壁好同看汲古雕來穴研鈔弁
言一葉並皆拋影撫補闕珍如寶不獨奇疑取互交此六
絕句爲借錢氏宋刻卻埽編而作其實未題於宋本後也
旣而夢廬知有是詩寄素箠索書 鐵琴銅劍樓書目會
昌進士詩舊藏嘉興錢氏有錢天樹印味夢軒二朱記

九經已有四經亡披髮巫陽下大荒一旦復還詩要義卿雲

如葢覆書堂

胡惠塘箠筵江

陌宋樓藏書志麗澤論說集錄十卷有當湖小重山館胡
氏遂江珍藏朱文長印胡氏名惠塘平湖人道光中藏書
家也 暴書雜記記錢夢廬語云龍龕手鑑昔年書友願

姓攜遼板大字本余慙恣小重山館主人購藏不果 莫
氏宋元本經眼錄毛詩要義有錢天樹跋云魏鶴山九經
要義 四庫全書載周易儀禮尙是全帙尙書春秋皆非
完本揚州阮氏得尙書三卷卽 四庫所闕之卷又禮記
三十一卷首闕曲禮上下二卷其餘四經竟無從咨訪矣
壬辰仲春遂江壻不惜重值購得宋槧毛詩要義首尾完
整觸手如新爲曹棟亭舊藏眞希世之祕笈也郡城金氏
藏有宋槧禮記首二卷卽阮氏所缺之帙當訪求之從此
易詩書二禮五經皆成完書眞大快事也遂江席豐履厚
而不以他好縈心惟古人祕笈搜訪不遺餘力是可尙已
授經如見伏生圖八十分湖一釣徒白髮紅顏相對寫阿翁

何似趙凡夫

陸筠瓠尊

章金益齋

錢儀吉陸瓠尊翁筠八十像贊積書滿家耄學勤刪羨擿
誤理放紛門庭整潔禮教敦苑枯一致娛斯文有晬者容
長說忻淑我里閭皆德薰蒲輪他年資方聞乞言百歲此
隱君 暴書雜記瓠尊名筠本貫吳江後寄居秀水其子
孫遂爲秀水學官弟子吾友金岱峯之婦翁也 又云咸
淳臨安志頌從秀水章益齋廣文金案頭見舊抄本乃趙
東潛借繡谷亭本過錄者益齋云以校汪氏新刊有可補
闕 又云益齋年逾古稀鈔書不輟二十年前嘗鈔樂書
全部影宋精絕共計一千二百餘葉以舊藏宋本更假東
津亭馬氏所藏宋本校正閱兩年而成圖譜多其長子婦

所繪吾家几山文學善揚之女也自陸丈瓠尊下世吾鄉
劬書者章君爲魯靈光矣 又陸蕢香暴書圖跋瓠尊先
生所藏書皆校勘精審得一善本丹黃不倦晚年猶從余
假何義門兄弟後漢書校本過錄余亦從先生得錄三國
志評點本未幾先生下世所藏盡散而蕢香能守叔父之
所授表而章之 張鑑題陸蕢香鑛鬱林山館圖吳趨諸
陸朱兩輻族均顧氏源平原又云他年相訪臨頓里何知
不是桑苧園

四面天青立秋隼搶揄肯共鷺鳩飛樊桐南野雖已矣元會
仲容或庶幾 曹言純種水 管庭芬芷湘

暴書雜記同邑曹種水明經名言純自弱冠後專心詞章

之學家苦無書借人書籍節取其精華蠅頭細書三十餘
年無慮千百冊余嘗勸其仿庾仲容子鈔馬元會意林鈎
元提要彙爲一編種水頷之而未暇爲今遺書滿籛恐無
人收拾矣近時海昌喜鈔舊籍而端楷不苟者莫若郭溪
葛泮南繼常余嘗從管芷湘庭芬處見其手寫談孺木海
昌外志周松靄海昌勝覽因至郭溪訪之相與訂交泮南
涓篤君子也芷湘與潘梧君藹人皆喜鈔書梧君專錄名
人文集寒暑不倦芷湘留心海昌掌故與泮南同而於目
錄之學尤爲專門近校讀書敏求記視邗上新刊者爲勝
陳節亭名欣時專鈔明季遺事不下數十種若排比成書
亦談氏國權之亞 李貽德贈曹種水詩我昨艤棹駕湖

旁白眉爲我談古香樊桐南野不可作後之勅者尤飛揚
少時森森挺玉筍藏鋸半爲買書盡草間狐兔不敢驕四
面天青立秋隼自注古香種水舊號 昌熾案種水藏書
處曰五千卷室亦見暴書雜記

元時文類漢時史定本校讐可殺青官冷身閒更何事深廬
注墨寫黃庭 錢泰吉輔立

王拯錢先生家傳先生諱泰吉字輔立自號警石先世本
何居浙之海鹽甘泉鄉養於邑錢翁數傳至復官大興縣
令先生考也先生官海甯州學訓導年甫三十七在海昌
爲暴書雜記兩卷自道所得成一家言海內藏書家爭購
傳之 甘泉鄉人稿藏書述余六經粗畢先大夫曰我有

書數千卷在吳橋縣王氏當取以畀爾迨先大夫喪歸過
吳橋縣之連兒窩王氏以書來歸遂攜以南籤排甲乙先
宜人顧而喜曰兒好書可以畢父兄之志矣惜吾家耆英
堂數萬卷盡屬他姓否則恣所流覽也歲丁卯世父得語
溪吳氏黃某村莊藏書盡舉以賜從兄衍石贈以通典通
攷南昌新刊十三經注疏從父中丞公又賜胡氏所刊通
鑑文選三十年來遇善本非力所不能得必購藏焉今雖
不及儲藏家十分之一而學舍中一堂二內所以充棟者
皆書也 又跋元西湖書院所刊蘇氏文類余舊藏建安
劉氏翠巖精舍所刊紙墨極精壬辰八月假莊芝階舍人
所藏校核乃至元二年西湖書院雕印之本也 又跋校

本元文類修德堂本由字缺筆當刻於明天崇時庚寅冬
日既用翠巖本校勘一過今春於蔣生沐茂才所見西湖
本假歸細校中有成化重刊訛字不少蓋今所見西湖本
皆印於明時不及翠巖本之爲元時初印也 又跋晉藩
刻元文類余見於吳山書肆有年矣道光己亥以事至杭
州偕金岱峯登山閱肆此書插架如故也乃市以歸暇日
當校其異同且訪求他本也 又記兩漢書校本初從李
廣文遇孫假其大父敬堂先生手錄義門校本自己丑十
一月至辛卯十月畢壬辰假武英殿本校一過蕭氏音義
宋氏三劉氏之刊誤館閣諸公攷證悉錄簡端欲續校後
書未能也癸巳春日得義門弟小山所校兩書乃先校後

書繼校前書甲午六月畢又得諸草廬先生所錄義門校
續志三十卷李本未備者得補錄焉甫里所謂精實正定
可傳或庶幾焉 又冷齋勘書圖記丁亥泰吉始爲海甯
州訓導先世遺書萬餘卷盡攜之學舍中取仇山村官冷
身閒可讀書之句以名其齋 又深廬肆書研銘道光庚
戌二月得潁上蘭亭黃庭舊拓本暮春之初獲此青花研
集帖中語銘之欣於所遇得於己快然自足不知老閒暇
無事修太平玉石落落是吾寶

羣玉英光訪寶章積書忙似鼠搬薑奩中舊史遺蠶室別下

叢編繼免牀

蔣光煦生牀

錢儀吉蔣母馬安人傳安人海昌馬氏歸候選布經歷蔣

君星槐亦州人也蔣君箴劉氏生子光煦十歲蔣君卒安
人課之讀涕泣告誡之光煦亦感動自厲於學 甘泉鄉
人橐以常南陔刻率更千文贈蔣生沐生沐報以漳蘭四
盆賦寄生沐詩蔣君邇來富墨妙佳刻喜得英光堂欲師
米老錄待訪寶章一一加評量自注生沐近得岳倦翁所
刻米帖 光煦刻拜經樓藏書題跋記後序光煦少孤先
人手澤半爲蠹魚所蝕顧自幼卽好購藏三吳間販書者
皆若人來則持書入白太安人請市焉輒歎曰昔人有言
積金未必能守積書未必能讀若能讀卽爲若市以故架
上書日益積稍長欲得舊刻舊鈔本而茗賈射利之術往
往索時下諸刻與易而益之金則輾轉貿易所獲倍蓰未

幾凡余家舊藏世所恆有之書易且盡矣今計先後裒集者蓋得四五萬卷 昌熾案先生撰東湖叢記其小引題咸豐六年丙辰七月放庵居士蔣光煦識於商觚周鼎秦鏡漢璧之齋又嘗刻別下齋叢書涉聞梓舊世稱善本弟光焞字寅昉吾友查翼甫燕緒之婦翁也亦好藏書翼甫奩贈中有元中統本史記余嘗見之

文獻吾家一綫危非公孰與祝延之公書剝落生芒未同病相憐笑蛇虵

胡珽心耘

楊文蓀秀實

呂晉昭胡文學傳胡君樹聲字震之又字雨棠原籍休甯父印川習鹺業遷蘇郡君應商籍補仁和博士弟子員善藏書所購多宋元舊本不吝值或更手自繕錄積至千百

卷顏其居曰琳琅秘室子二珽勳常 葉廷瑄吹網錄胡
心耘名珽浙江仁和人太常寺博士僑居吳下好收宋元
舊本書手自校勘有得卽記數年來與余爲賞奇析疑之
交庚申冬避亂滬城辛酉四月歿於旅舍年四十所著有
石林燕語集辨嬾真子錄集證二書皆未刻蒐采詳贍可
傳之作也 又石林奏議宋本十五卷百宋一塵賦所謂
脈石林之奏議鬱剝落而生芒也後歸三十五峯園汪氏
未幾汪氏藏書亦散爲吾族人某所得欲重梓而無力近
聞胡君心耘搜羅祕籍遂介余以歸之胡君欣然影鈔數
本流布四方而以原本精裝什襲蓋自開禧鈔板七百餘
年幾至湮沒而復傳于世亦公之精神默爲呵護哉 又

浦西寓舍雜詠良友他鄉慰索居誓收祕籍劫灰餘如何
遽返瑯嬛地拋擲遺編絕蠹魚注云仁和胡心耘欲廣收
已散之書辛酉夏賫志而歿遺書且莫保矣 昌熾案石

林奏議今歸茗上陸存齋觀察已影寫付雕矣石林燕語
集辨嬾真子集証二書在張孝廉叔朋處屢勸其付梓未
果也心耘所居在吾郡定慧寺巷其所排印琳瑯祕室叢
書四集三十種宋于庭徐山民爲之序世甚珍重同時寓
公海昌楊文孫字秀實號芸士亦好藏書余在罍里瞿氏
見龜溪集金亦陶鈔本卽芸士舊藏也錢衍石給諫楊芸
聖小象贊云鬱天人之策而功在藝林踐退讓之節而名
聞東南久不相見何貌之臞何思之深誦暮年之詞賦感

不絕於余心

繡髻諸子走都市牽絲撮弄又何知忽嫌架上無精本如此
椎埋亦大奇

勞權平甫

弟格季言

師友淵源記勞權字平甫格字季言居浙江仁知之塘樓
鎮髻年俱以治經補弟子員後遂不與試丹鉛雜陳專攻
羣史時人有二勞之目 丁寶書勞氏讀書雜著序勞氏
羣從長青主次異卿幼季言爲笙士先生之喆嗣笙士博
覽多間撰唐折衝府攷未脫橐季言續成之爲世所稱季
言校元和姓纂大唐郊祀錄北堂書鈔蔡中郎集文苑英
華及唐宋各家文集示予皆丹黃齊下密行細書其引證
博而且精 又云異卿精於校讐之學季言所著殘缺失

次予窮數年之力輯成讀書雜識十二卷又唐御史臺精舍題名考二卷郎官石柱題名考二十六卷爲仁和趙星甫太史鉞創稿而季言續成之 勞檢亡弟季言事略季言嘗鐫一小印曰實事求是多聞闕疑凡所校之書必鈐其印於卷端同治三年甲子四月二十五日歿於同里寓舍年僅四十有五無子 葉廷瑄浦西寓舍雜詠眞讀書人賊亦欽纖塵不使講帷侵黃巾知避康成里漢季儒風又見今注云仁和勞季言家塘棲累代富藏書季言尤以博洽名賊酋至其門戒其徒謂此讀書人家毋驚之入室取架上卷帙觀之曰聞此家多藏祕籍何此皆非善本殆移匿他處邪徘徊良久不動一物而去賊亦知書異哉季

言人素篤實貽札自述當非虛語 韶宋樓藏書志西溪

叢語勞異卿藏本題云咸豐丁巳八月二十六日仁和勞
權記於秋井草堂一題蟬隱一題丹鉛精舍主人記又西
陽雜俎題云異卿權識于拂塵掃葉之樓又丁鶴年集題
云癸卯九月四日書於玉參差閣臥室又詩家鼎鑪題云
八月二十一日蟬隱初度又扣舷集題云咸豐甲寅六月
追暑漚喜亭得閒鈔此飲香詞隱記於池上西窗下又眉
庵詞題云咸豐甲寅閏七月移家玉參差館飲香生記

河間君子館甌館廠肆孫公園後園月老新書紫雲韻長歌
聊爲續梅邨 劉位坦寬夫 子銓福子重

何紹基懷都中友人詩退翁餘韻在檐楹天咫宦中面百

城妙有兒郎能好古，勤收翠墨饌先生。自注劉寬夫所居，卽孫退谷遺址。乃郎子重亦好古，昌熾案寬夫先生名位，坦子重名銓，福大興人，藏弄極富貴，筑黃子壽師其女夫也。余客歲館子壽師，次君再同前輩京邸，見宋刊婚禮備要，月老新書紫雲增修校正禮部韻略，皆先生舊藏。月老新書尤爲奇祕，余倣梅邨祭酒體作長歌一首紀之。再同云先生疊書龕在城中廣濟寺，因得河間獻王君子館，甄名其居曰君子館，甄館又曰甄祖齋，所居在後孫公園，其門帖云君子館，甄館孫公園後園，今其孫尙守舊宅而藏書星散矣。

西湖三篋空手寫煙水秦淮正，黯然回首東園高樹畔，諷書

嘒嘒正鳴蟬

朱緒曾述之

甘福德基

陸心源開有益齋讀書志跋上元朱述之先生諱緒曾道光初舉人一目十行無書不覽藏書甲於江浙累官浙江秀水孝豐知縣有循聲其書仿郡齋讀書志之例而精核過之 劉壽曾開有益齋讀書志跋上元朱述之先生以研經博物聞名東南所著開有益齋集都十餘萬言佚於兵火此讀書記六卷金石文字記一卷蓋全集三之一先生詰嗣桂模之言曰先君子藏書至富每遇祕笈尤喜傳鈔咸豐癸丑粵寇陷江甯先君子方官浙中慨收藏之灰燼因取旅次所存數十篋日夕關覽掇其大旨筆於別簡其假自友朋者亦爲題記嘗曰吾集與甘泉鄉人稿相類

無空言也 甘元煥讀書續志跋先生所居秦淮水榭藏書十數萬卷丹黃斟酌畫皆精審先石安仲兄喜接鄉邦掌故及金石雅訓之學時從討證先生輯金陵詩徵亦假余家津逮樓書瓶借往還幾於置驛先生官浙水又獲鈔文瀾閣本故所弄宋元祕笈多外間所罕見者昌熾案甘君字建侯爲余丙子同年 開有益齋讀書志緒曾祖父雲浦公年八十手寫爾雅以爲娛老清課故緒曾七歲卽熟誦此經嘗於秋日先父攜至東園苑家橋蟬嘒嘒鳴高樹命誦釋蟲篇蝸屬索解不已 曩書雜記述之權知海昌得縱觀所藏書余擬助之編纂書目述之調任嘉興遂不果後其書載歸金陵已付劫灰矣 張文虎感逝詩藏書

遭賊焚三篋還自寫一官落西湖所不愧風雅何時鏡湖
水流到西陵下注云朱述之太守家江甯藏書甚富燬於
賊君在浙公暇寫書不倦咸豐十年賊破杭州客死山陰
又秋日懷人詩萬卷殘書付劫灰烽煙回首尙驚猜西湖
收拾閒風月珍重瑤編遠寄來注云朱郡丞緒曾在浙得
祕籍輒以見寄 續纂江甯府志人物傳甘國棟字遴士
江甯人晉于湖敬侯卓裔也家有津逮樓積書至十餘萬
卷子福遐年延年福子煦字耆壬弟熙 又孝友傳甘福
字德基號夢六生平嗜學慕古蓄書極富至今談收藏者
猶稱甘氏津逮樓焉著有保彝齋日記鍾秀錄 又目錄
類甘福津逮樓書目十八卷